

SINOPSIS

KENEGARAAN MALAYSIA sebagai satu kursus khas di institusi-institusi pengajian tinggi mempunyai keistimewaan tersendiri. Istimewanya bukan terletak pada status kursus ini sebagai 'kursus kerajaan' tetapi cara pembelajarannya agak berbeza dengan kursus-kursus lain yang ditawarkan. Ia tidak memerlukan penghafalan semata-mata tetapi yang lebih penting ialah pemahaman dan penghayatan. Pada peringkat yang lebih tinggi pemahaman nilai-nilai murni yang tersirat dari tersurat di dalamnya boleh diamalkan dan dijadikan sebagai satu amalan cara hidup setiap warga Malaysia yang berbilang kaum itu. Coretan sejarah negara, semangat tolak ansur antara kaum dan peristiwa-peristiwa penting yang mengiringinya yang dipaparkan dalam buku ini menyelitkan nilai-nilai murni yang dimaksudkan itu. Proses mengisi peluang kemerdekaan yang digambarkan dalam buku ini juga menggaris kasar semangat dan nilai murni kehidupan masyarakat berbilang kaum di Malaysia. Buku ini bukan tentang sejarah secara khusus. Namun begitu, ia mampu sedikit sebanyak memaparkan penerusan sistem pentadbiran negara pramerdeka dan pascamerdeka. Sistem pentadbiran negara moden demokrasi ala Malaysia - raja berperlembagaan, sistem dan hubungan kerajaan pusat dan negeri, pilihanraya dan institusi perlembagaan yang mendasari perjalanan pentadbiran negara dibincangkan dengan agak mendalam. Dalam proses pembentukan dan pembinaan satu negara bangsa Malaysia di abad ke-21 diketengahkan juga polisi-polisi kemas kini kerajaan yang berwawasan memandu arah rakyatnya menuju kecermerlangan seiringan dengan ideologi negara yang pragmatis.